

洵陽縣鄉土志

耆舊錄


事業見於實行者
孝友睦婣任恤
學問見於著述者

附名宦祠

鄉賢祠

節孝祠





耆舊錄

事業見於實行者

粵稽前代洵有先達將軍扶猛如茅初拔

扶猛字宗畧上甲黃土人也梁大同中以直後出為持節厲鋒將軍青州刺史以功封宕渠縣男

封於臨江生於黃土儀同三司位登開府

入周後猛以功授車騎大將軍儀同三司加散騎常侍累功進爵臨江縣公

許中執禮伏闕力爭致受廷杖謫降南中

中明時大棕溪人正德進士官御史敢言不避勢要世宗詔稱興獻帝為皇考中偕同官等跪伏左

順門必得俞旨乃起自辰至午再傳諭跪伏不起
帝大怒分別杖責降罰有差中謫江南亳州州判

吳君文遠沈君本泗仕多異政無慙循吏

文遠明時松木溝人本泗蜀河里人文遠官夔州
府推官擒蜀寇有功本泗以治理有效晉合州知州

胡柎宦晉起自邑候歷官風憲遺惠三州

胡柎前明洵河里人由選貢除山西夏縣知縣晉
保德州知州惠政洋溢兩處各立生祠歷官貴州
思州兵備道

秋曹文翰黔南典試修築洵城鴻文自記

劉文翰明時冷水河人崇正進士由知縣改刑部
主事偕行人陳際泰典貴州鄉試官易州兵備道
今邑中修城碑記載府縣志其手製也

明時李瑜廣西叅政父子祖孫科名繼盛

瑜明時人原籍江西吉水縣隨其父流寓洵城遂占籍焉由舉人初任吏部司務遷廣西布政司叅政所至皆有循聲貽謀裕後子聯芳孫希參洵登科第故有祠堂即今義學之址

梁喬初任訓導扶風大府愛才薦牘推升

喬明時草坪舖人由歲貢任扶風訓導大府重其才保升山西孟縣知縣歸里後偕署縣史采知縣姚世雍共修城垣

鍾氏奇傑難弟難兄連枝同秀並捷南宮

鍾儀奇儀傑

國朝柳村舖人兄弟俱文名踔厲儀奇登康熙甲辰進士儀傑登丁未進士

或秉一麾或膺百里均有清操奉公潔已

儀傑選河南息縣令值歉歲履畝勘賑因有遺漏
累遷文選司郎中改授廣州府知府潔已奉職不
避權要不營貲產以疾卒於官儀奇號南山丁未
進士選山西河津縣知縣亦多善政以終養歸

朱氏國璽訓導西鄉隨材教育俗化敦龐

國璽字玉印

國朝高店鋪人康熙時由歲貢任西鄉縣訓導風氣
猥薄隨材教育變化氣質歸於敦厚將去任諸生
堅留之遂卒於官

俊揚禦寇執戈戎行戰於平利忠節留芳

劉俊揚

國朝武庠生縣城人嘉慶時隨楊帥遇春征教匪屢

旨廕襲雲騎尉子鵬由廕生歷署白河孝義千總

連城忠孝有勇有謀廕生報効克壯其猷

劉連城名璞

國朝縣城內人遷居問河口生而岐嶷幼承家學事父及繼母皆孝家貧採薪汲水勞苦備至同治初年以廕襲投効撫標隨多忠勇公征陝徇又隨曹提督轉戰甘肅身經數百戰以功授總兵

再鎮河州徇氛不靖擊賊保民以寡勝衆

乙未河湟徇亂大兵西征而米拉溝徇叛璞選精銳三百餘人擊賊數千截堵要口保全難民十餘萬又嘗追賊乏糧掘芋食菜夜度青沙嶺冒風雪經險崖卒轉危為安更獲全勝疊經總督楊公昌濬陶公模密奏璞謀勇兼全補河州總兵署涼州

鎮卒於京師

孝友

歲貢羅謀孝親不仕張立孝行割股愈父

羅謀嘉慶時歲貢以孝友聞高蹈不仕吉水羅洪先為立傳張立新安里人隨父遠賈值禱雨斷屠父病久思肉不可得立割股肉以佐食父病尋愈

樵夫文煥性孝家貧典衣市肉竭力奉親

宋文煥城北隅人賣薪養親父瞽冬寒思肉食文煥典衣市肉以進父不知其單也鄰里代贖歸之雍正元年與領粟布

羅氏登科百口同堂孝友敦睦六世在庠

羅登科世居邑東高店舖天倫敦睦六世在庠老

幼共百十有八人合食無間言

梁氏正屏菽水娛親友恭兄弟邑令旌門

梁正屏邑庠生家貧躬薪水以養母甘旨不闕待
同氣亦友恭邑令劉琪旌其門

張子奉母避亂遇賊乞代母死賊兩釋之

張孝子遺其名嘉慶時負母避亂遇賊欲傷母而
擄子孝子祈舍母以身代母受及賊感其義遺米
肉兩釋之

唐氏顯榮王氏廣明割股奉母愈疾延齡

顯榮母病思肉割股以進病即愈廣明母有疾割
股二次啖母不令知里人咸仰其孝

趙梅避賊棄子救母賊感其孝捨而不擄

趙梅構園鋪人嘉慶時教匪掠境梅母老子幼語
妻孫氏棄子救母妻泣從之乃負母而逃梅被擄
泣曰我死不足惜老母將誰依乎賊釋之

李氏致和水及父柩慟感鄉鄰破壁共救

致和趙家灣人父歿未葬大水及靈柩家人咸避
和獨撫棺大哭曰吾必與柩共存歿鄰里感其義
破牆昇棺出

從新奉母遷居別墅生盡孝養歿守廬墓

胡從新小關鋪人事母至孝家人衆多母厭其煩
新另築室與母居凡應用之物無不具嬉笑娛母
一如幼時母歿廬墓三年

張氏席珍孝友兼盡家規肅然一門和順

張席珍七里關武生父再娶生四子珍孝友兼全

父病偏枯凡起居飲食皆珍親奉教諸弟耕讀督課不怠家規肅然堂弟琳夫妻俱歿珍撫其子如所生

張氏廷友母亡父瞽傭身葬母竭力事父

張廷友七里關人傭身以葬母父目雙盲扶持奉養十餘年勞苦萬狀卒無怠志

儲氏明海孝友兼全長幼百口均無間言

儲明海七里關人孝友敦睦長幼百口同居無間言鄉里賢之

善士宏鰲慷慨樂施子復孝友分田取瘠

孫宏鰲竹筒河人廣行善事子德恒性孝友兄弟分田宅恒自取瘠敝者後漸裕仍安樸素壽九十二無疾而逝

發成母病願以身代憐恤孤貧施予慷慨

華發成小棕溪人事母孝母病篤祝神願以身代
及母歿哀泣幾致失明性好施恤孤貧耗財不吝

雷生尋侄泣訴賊前徧求弗得後竟生還

雷啟螫桐木溝人邑庠生同治時髮逆掠境兄子
被擄螫終夜泣親詣賊營陳情哀祈賊感其義使
遍覓營中不可得後姪果逃歸

郭氏中喜市肉奉母失肉投河神靈呵護

郭中喜泥溝鋪人母病思肉羹喜傭工得百錢市
肉肉忽失去氣憤投河流四里許獲救自云水底
若有人捧之得不沉

建棠母病刺血調藥父病禱神願代沉疴

趙建棠趙家灣人母病危割肝未得以所刺血調藥進之父病禱於神願以身代鄉里皆稱其孝云
禮麟割臂廷喜割股孝心純篤母疾均愈

錢禮麟錢家河人母病竭誠禱神夢神曰病須人肉可痊麟割臂肉和藥進之母病尋瘳徐廷喜仙河舖人母疾思肉貧不能得乃割股以啖母終身茹素

才元割股親病獲痊神憐其孝父得延年

葉才元性至孝父病危元割股調羹以進病愈復活三年又病謂元曰我復活三年以神感汝孝故耳今數已盡毋再苦也遂死元為孺子泣里人哀之

張氏德林母病割肝鄰人醫救俱獲安痊

張德林仙河舖人母久病林割肝一片將烹進而
暈倒鄰人醫救數日母子皆愈

鴻春純孝割肝療親母子無恙邑令旌門

楊鴻春西岔河人母心痛春聞肝能療心疾夜祝
神祠割肝私烹以進食之病愈春亦無恙邑令詳
大府請旌為作孝子傳

成義割肝發貞割股母病獲痊純孝罕睹

孔成義大金河人母病危醫藥罔效義割肝以療
母病旋愈胡發貞洛家河人母病思肉貞割股烹
而進之母病亦愈

得慶割肝孝本純誠堅辭舉報不願邀名

查得慶龍家河人父有疾禱神割肝以進病愈鄰
里欲報官慶止之曰我子職未盡敢以是邀名乎

恢緒羅姓幼鬻張氏孝事後母洗滌瘡痍

恢緒大金河人本姓羅賣身張姓事後母孝母有惡瘡周身潰臭緒為滌洗敷藥自食粗糲而奉母必具甘旨如是者十一載母歿哀毀盡禮

馬氏敬明克盡子職如烏反哺晝夜扶持

敬明西岔河人傭工養母必以甘旨母病寒顫恒臥床不起明日則喂食夜則捧溺終日依依牀下未嘗有倦容母歿哀毀骨立未幾亦卒

緒宗奉母日負出入喂食解衣八年如一

馮緒宗紅土寺人性至孝母得偏枯疾妻弱難兼任宗日負母出入喂食解衣未嘗稍懈出外雖夜必歸八年之久如一日

王氏安甯母疾祈神割肝和藥母子俱存

安甯大神河人母疾篤夜禱神祠啟脇割肝和藥
以進母疾若失甯亦尋愈

睦嫻任卹

陳氏國良推獎善類里黨婚喪樂為助費

國良泥溝鋪人常推獎善類以勉後進里黨有婚
喪無力者每貲助之

吳氏一江厚待遺僕近族貧孀分給粟廬

一江柳村鋪諸生祖官縣令遺僕數人一江憫其
勞還其身券親房二孀婦貧寡無依俱分宅給粟
文藝寬和善撫同氣偶拾遺金歸還不昧

李文藝洵河里人邑恩貢性寬和撫育同氣耕讀
得所曾還河南賈客所遺金二百餘兩

潘氏文光義設舟楫每遇荒年調恤鄰里

文光柳村舖人修義渡以利涉乾隆時歲饑赴楚市米調恤鄰里

劉浩謹身服賈三倍盡以周急貧困不悔

劉浩松木溝人謹身寡過服賈所得因周急而折閱貧困不悔

張氏漢卿家僅中資濟人緩急鄉黨賴之

漢卿孟家河人家本中產常出其餘以周人緩急鄉黨推任卹焉

郭氏資普自奉儉嗇歎能恤貧尤敦族戚

資普小棕溪人自奉過嗇常儲有餘遇凶年貧乏胥待給焉尤敦族誼

胡氏敦族和睦鄰里樂助婚喪 恩給帛粟

胡顯榮趙家灣人敦族睦鄰有婚喪不能舉者必助之費視親疏以為厚薄壽八十八歲邑令詳領粟帛

文基敦本教有義方婚喪無力相助傾囊

郭文基熊耳溝人性寬厚以義禮教人人多化之咸里或婚葬無資基傾囊相助不索償

德萬敦厚治家有法葬瘞枯骨矜恤孤寡

陳德萬邑北沙溝人性敦厚有餘輒周窮乏常市棺木瘞枯骨力不足則借貸為之

梁瑤孝友業精岐黃施藥濟世貲助婚喪

梁瑤柳村鋪人性孝友精醫術施藥濟人里中婚

喪不能舉者恒出貲周之子孫多列邑庠人謂其積德之報云

洪氏在位義設渡船三世繼志功德綿延

洪在位兩河關人好施予關為往來通道每河水盛漲行人苦之位倡捐錢六百緡邀同里謝趙二姓共捐錢四百緡設造官船利濟行旅子忠仁孫良棟又推而廣之功德三世人咸樂道

黃棟好施忠厚家風臨終焚券遺惠貧窮

黃棟趙家灣人好善樂施將歿時焚貧家借券數百緡以積德語子孫鄉人多樂稱之

張氏德明好義恤貧濟軍納米邑令旌門

張德明竹筒河人輕財好義嘉慶時壯果公德楞泰帥兵勦賊至竹筒河值糧乏德明納米五十七

石以濟軍邑令嚴公旌其門子賡颺亦好施值大
饑有穀百餘石悉出以濟貧子孫多入邑庠蓋好
施之報云

張氏景先修寨捐金義倉入穀救旱恤貧

張景先竹筒河人教匪之亂慷慨捐金修築寨洞
又捐穀入義倉知府葉世倬給匾獎之

趙氏成英溫文善醫惠恤孤貧救難濟急

成英武庠生趙家灣人性寬宏舉止如文士精岐
黃術貧富皆不索謝又倡修橋梁以濟困乏

義渡捐修子孫繼志廣刊善書流傳勸世

英子世鰲捐修義渡竭力為之孫建中刻善書十
餘種以勸世

懷卿好施出穀貸貧歿日臨吊三百乞人

朱懷卿乾溪鋪人性喜施鄉里饑寒輒酌人丁多寡出穀以貸不取息乾隆時大饑捐賑外施粥半載活人甚眾歿日乞人吊者三百餘人

趙氏永貴給食配軍施捨義地祭掃孤墳

趙永貴縣城人嘉慶時以祖置小河北地捐作義地以葬孤貧又以地租給配軍口糧兼祭掃孤墳迄今子孫蕃衍

李氏賑饑孫亦好義捐修溝道化險為夷

李登舉大嶺鋪人有善行乾隆時大饑施糧以賑鄉鄰孫茂先亦好義舉捐修關溝險路十八里皆坦途

廷舉讓產天性孝友好義尤殷造舟修路

黃廷舉小河北人性孝友析居時讓產不吝嘗督
修洞礪金帶路及小河義渡以濟行人

劉氏仁厚存恤遺孤代備脩脯俾就讀書

劉萬才縣城人有孀婦子某貧不能讀書才代備
修脯使受學親鄰有事量力周卹

廷相樂輸賢褒邑令捐麥卅石指困不吝

李廷相構園舖貢生成豐時邑籌捐款廷相捐麥
四十石以佐公令嘉其賢

趙氏積遠學富家貧授徒里塾不計束金

積遠仙河舖人少勤學家貧未應試念寒士多因
修金廢業遂授徒里塾不計束修及門桃李稱極
盛卒年八十餘門人建祠祀之

陳氏疏財代完破鏡尤善排解遐邇心傾

陳朝珍梁家河人性寬厚好施濟壽八十九子正
強行多義舉鄰子某婚娶無力為出貲完配荒年
有鬻妻者為贖歸之平日排難解紛尤多歿日吊
者千餘人

劉醫亡名濟世術精揉摩按穴起死回生

劉醫亡其名邑北熊耳溝人生長河南精方脈人
有腹疾揉摩即愈或痛不能支按穴捻之即死緩
緩揉之痞積既散又按穴捻之復生矣疾亦霍然
人呼為劉半仙

李氏用先醫術濟世貧富感德立祠以祀

李用先大嶺鋪人精醫術貧富皆不索謝活人無
算壽八十一鄉人立祠祀之

學禮精醫歿而靈異居民感德祀於佛寺

劉學禮廟溝鋪人精醫術救人甚眾卒後數歲村民患疾者輒夢授藥醒而祝之即愈居人感其精靈附祀於彌陀寺

李氏光甫輕財好義多造橋梁行人利濟

李光甫桐木溝人輕財好義兩河關至桐木溝緣溪行數十里無橋梁甫施地組三石餘每歲十月朔修石砘二十餘處以便行人

李泰放生不惜貲財憫人漂沒倡會掩埋

李泰縣城人喜買物放生漢水漲泛人有漂沒者泰倡會掩埋二十餘年不倦

國富撫孤不負席琳理家井井教誨克成

儲國富七里關人幼孤貧寄食張席琳家琳病篤託以幼子仕仁富泣允琳夫妻繼亡富撫仕仁竭力保全理家務井井有法又延師教讀仕仁長而成立皆富力也邑令以義行可風獎之

張氏仕仁急公好善代友撫孤懇摯不倦

仕仁七里關人好義舉光緒三年大饑捐穀數十石全活甚眾同學某家貧仁周其匱乏某歿代撫遺孤凡遇團練倉賑諸公務勞力耗財無德色光緒八年陝西道給匾獎勵

譚氏連生視侄猶子重義輕財廣行善事

譚連生大金河人援例得四川通判弟早亡遺弱姪多疾連生視猶已出鄰生某以貧廢學資以膏火使成立歲饑賑卹不稍吝惜平日設義塾修橋渡造寺廟種種善行為之不倦府縣屢給匾獎勵

進京知醫藥方濟世助設義渡樂善不疲

京柯姓趙家灣人清潔茹素通方脈立功過格以自勵家僅中資樂善不倦鋪修義渡竭力助之

羅氏兄弟克篤天倫捐穀救旱恤孤憐貧

羅克顯南鄉人善處兄弟好施捨有餘財輒出以濟困乏光緒二十三年旱荒捐穀倡賑舍活甚衆

以上諸子各有性情作事雖異好善則同

以上諸人事迹各不相同心則同歸於善自有邑乘以來數百年得善士如右亦洵邑之菁華也

造舟修路卹孤憐貧救荒周急濟世活人

善士孔多悉登於冊備觀感也

嘉模令範堪作儀型洵涓漢許永仰芳名
樹善人以為的後生小子取法非遙高山仰止景
行行止其三思焉

學行

學問見於著述者

張子博雅前代之賢農曹主政著作萬言

張光世名鳳翔前明宏治進士目羞日暗處反明
官戶部主事下筆千萬言

名高夢陽契深邃庵有伎陵集於今失傳

與李夢陽同舉於鄉又同官戶部主事而聲名出
李上尤為楊邃庵所深器求識面者無虛日以疾
卒於京師馬考功輯其遺文曰伎陵集今失傳

羅華博洽才堪治劇蒞任雲南著續賡集

羅華成化辛卯舉人學問博洽才器堪應繁劇任雲南南甯縣知縣所著有杜律續庚集

胡源明經甘老園林縣志舊橐遺作無存

胡源草坪舖人歲貢生學問優贍時明經資格亦易服官源獨甘老邱園讀書自樂著有縣志舊橐今不傳

樸園篤行一代碩儒寄籍安康高登賢書

董詔字樸園生長城北水磨灣寄籍安康乾隆甲午科舉人為南山之碩儒

積學篤行書多手著博學宏詞躬膺榮遇

詔為葉太守所敬重舉博學宏詞科著有說文測議正誼堂文稿讀志勝說諸書又佐鄧公夢琴修洵陽縣志佐葉公世倬修續府志入祀郡城鄉賢祠

劉子繼昨早舉於鄉修學倉志討論精詳

繼昨字賜谷閭關鋪人道光壬辰科舉人主講洵陽白河兩縣書院曾佐安康孝廉張鵬飛修學倉志

傑菴潛修品端學粹遺稿所存孝經釋義

傑菴姓郭氏名士豪邑恩貢其文詞雜稿皆藏家未梓著有孝經釋義行世

其弟子明素邃於易來註折中合訂可誌

子明名士高亦恩貢性孝友居母喪茹素三年且正直持躬人多化之邃於易嘗手錄周易折中及來註合為一書隨事占象多奇驗

附名宦祠

大成門外有祠名宦澤遺洵民千秋如見

名宦祠在文廟大成門外左雍正七年知縣韓德

修建

酈商肇祀郭進並芳原傑道宏俎豆之光

內祀漢景侯酈商 宋統制郭進 明副都御史

鄭陽巡撫原傑 大理寺少卿鄭陽巡撫吳道宏

李肅張勉蔣昺公韶羅熙南北循吏名高

知縣李肅 知縣張勉 知縣羅熙 知縣南北

知縣遷按察司僉事蔣昺 知縣歷官戶部侍郎

高公韶

史采世雍薛昌映榴有李宸燦同著模猷

署知縣興安州州判史采

知縣姚世雍 主簿薛昌
朝贈兵部侍郎陝西督糧道諡忠節葉映榴
知縣李衷燦

天祥維琇並著循良嚴公如煜祀典增芳

知縣沈天祥 署知縣于維琇
知縣歷陞按察使贈布政使嚴如煜

鄉賢祠

馨香俎豆上祝鄉賢芳徽猶在景仰高山

鄉賢祠在大成門右雍正七年知縣韓德修建

張公鳳翔御史許中推官文遠亦步芳踪

內祀明戶部主事張鳳翔 御史謫亳州州判許中
夔州府推官吳文遠

節孝祠

節孝一祠大成門右冰霜之操中帼之秀

節孝祠在大成門右雍正九年知縣袁海建
乾隆四十七年知縣鄧夢琴重修

王周謝馬張氏繼之前代貞烈卓卓可書

內祀明戶部主事張鳳翔之妻王氏
御史許中之妻周氏 進士李聯芳之妻謝氏
民人王論之妻馬氏 民人劉裕之妻張氏

吉氏吳氏節孝堪欽余劉彭氏鄉黨同尊

國朝舉人宋英之妻李氏

旌表節孝貢生鍾蘆之妻吳氏

旌表節孝民人宋書之妻余氏

旌表節孝民人李本樸之妻劉氏
旌表節孝民人王紹增之妻彭氏

羅范二氏並著節烈張呂與何操守之傑

旌表節烈民人馮告之妻羅氏

旌表節烈民人陳允彩之妻范氏

旌表節孝民人王學道之妻張氏

旌表節孝民人劉學泰之妻呂氏

旌表節孝民人楊開泰之妻何氏

